

Secundo, accepitque denominationem istam ab Arce Luchtenberg, etiam si Principes Dominii illius curiam suam teneant in Opido Pfreimbdt: & quandoque in Grunsfelden. Non crevit iste Lantgraviatus in tantam potentiam ut ceteri tres, qui temporum successu multum aucti sunt, ditione & potentia: maxime autem Habsiæ Lantgraviatus, ut scribit Munsterus. Regionem hanc irrigant beantque plurimum *Egra, Nabus, Flumina, Vilsus, Regus, Pegnutius, Schwarzbach, Sultza, Altmulus, Laberus, Lanttra* fluvii; ac præter hos nonnulli alii. De Regnitio, Rednitio sive Rego referunt historiæ commoranti Carolo Magno apud Ratisbonam persuasum fuisse, fore ut ex Rheno in Danubium navigari possit, si inter Radiantiam (hic est Regnitius) & Altimulum fluvios fossa duceretur quæ Navigiorum capax esset: quod horum fluviorum alter Danubio, alter Rheno misceretur. Confestim Rex ad locum opportunum accelerat, ac magna hominum multitudine coacta, totum Autumni tempus in hoc consumpsit. Ducta est itaque fossa inter prædictos fluvios duum millium passuum longitudine, trecentorum pedum latitudine, Sed res successu caruit, nam propter juges pluvias & terram naturam palustrem, opus stare non potuit; quantum enim interdiu egestum fuerat, tantum noctu humo relabente subsidebat. Apud Weisiburgensē Opidum extant etiamnum vestigia vani laboris. Silentio non est hic prætereundum, omnes fere Nariscorum seu Nortgoviorum fluvios fabricis Ferri, & reliquorum Metallorum onustos & impeditos esse; utpote quorum fluentia agunt & impellunt, tam ingentes folles, quam immensos malleos, Fabris, Ferrum tantum suppositis incudibus, admoventibus. *Mons Pinifer* vulgo *Fichtelbergk* in ambitu completens circiter v i milliaria est in hac regione: ex eo quatuor insignes profluunt fluvii, *Mœnus, Nabus, Sala, & Egra*, ii in crucis modum divaricati, 4 mundi cardines petunt. Mons iste varia gignit Metalli genera, producit & optimum caruleum colorem, quem vulgo *Lazurum* dicunt. Invenitur quoque in summitate Montis Stannum, & multæ foveæ ex quibus olim Metalla fuerunt eruta. Silvæ Hercyniæ portionibus, hæc ora etiam undique conspersa est: ex his sunt *Weissenburwalt, Behemerwaldt* cum aliis, quæ in tabula representantur. Porro suscepta fide Orthodoxa in Bavaria, simul Leges & vivendi Instituta genti fuere præscripta, nempe de Ecclesiæ libertate, de incendiariis Ecclesiarum, de confugientibus ad Ecclesiam, de Clericorum percussoribus, de Decimis, de seditionum poena, item Leges castrenses, de Libertis, de Nuptiis, de causis mulierum, de Furtis, de Legibus Agrariis, de commendatis & commodatis, de Hereditatibus, de Emptionibus & Venditionibus &c. Illis Legibus Bavari ante aliquot secula parvere, nonnullisque adhuc. Non possum autem quin aliquot hoc in loco ex his adscribam Bavarorum Leges. *Iudex ut iuste judicet Librum penes se Legis habeat, ex eo causa omnis componatur. Neque personam neque munerem spectet iudex, sed de compositione, dum recte judicaris, partem nonnam accipiat. Sin perperam, duplo, quicquid lata sententia abstulerit, exsolvat: insuper solidis xl mulctetur. Qui rem aliquam vendiderit precio accepto, emptionem aut charta aut testibus ratam faciat, duo, tres, vel plures testes adhibeantur. Venditio nisi voluntaria & libera, firma non sit.* Plura addere superfedeo, ne quis hanc descriptionem me onerare legibus velle existimet, quæ a Ioanne Boemo Aubano fuisse describuntur.